



Broj: 03-04/2-02-27613/24  
Sarajevo, 09.05.2024. godine

**VLADA KANTONA SARAJEVO**  
**gosp. Nikad Uk, premijer**

**PREDMET: Izjašnjenje na zastupničku inicijativu zastupnice Jelene Pekić,**  
**dostavlja se -**  
**VEZA: Zaključak Vlade Kantona Sarajevo, broj: 02-04-25530-41.3/24 od**  
**25.04.2024. godine**

Tačkom 2. Zaključka Vlade Kantona Sarajevo, broj i datum veze, Ministarstvo pravde i uprave je zaduženo da dostavi Vladi Kantona Sarajevo mišljenje na zastupničku inicijativu iz tačke 1. istog Zaključka, odnosno na inicijativu zastupnice Jelene Pekić koju je uputila u skladu sa članom 213. stav (1) Poslovnika Skupštine Kantona Sarajevo ("Službene novine Kantona Sarajevo" br. 41/12 – Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22 i 17/22 – Ispravka) u okviru 14. radne sjednice Skupštine Kantona Sarajevo kako slijedi:

*"... za propisivanje obaveznog uspostavljanja Registra godišnjih izvještaja o poslovanju javnih preduzeća, javnih ustanova, fondova, agencija i zavoda čiji je osnivač Kanton Sarajevo."*

U obrazloženju koje je zastupnica Jelena Pekić dostavila uz svoju inicijativu navodi se da postoji nedostatak adekvatnih mehanizama praćenja i javnog prikazivanja finansijskih izvještaja, kao i nedostatak transparentnosti u finansijskim operacijama javnih preduzeća, javnih ustanova, fondova, agencija i zavoda čiji je osnivač Kanton Sarajevo. Dalje se navodi da bi uspostavljanje Registra godišnjih izvještaja o poslovanju javnih preduzeća, javnih ustanova, fondova, agencija i zavoda čiji je osnivač Kanton Sarajevo, kao integralnog dijela web platforme Ureda za borbu protiv korupcije Kantona Sarajevo, omogućilo lakoću pristupa ključnim informacijama o finansijskom poslovanju javnih institucija svim zainteresovanim stranama, a prije svega građanima.

S tim u vezi, Ministarstvo pravde i uprave daje slijedeće izjašnjenje:

Članom 7. stavom (4) tačka c) Uredbe o vrsti i postupku objavljivanja propisa i javnosti rada organa uprave, javnih preduzeća, javnih ustanova i pravnih lica čiji je osnivač Kanton Sarajevo ("Službene novine Kantona Sarajevo" broj 21/19) propisano je da su izvještaji o radu organa javnog

sektora obavezan sadržaj njihovih web stranica. Pored toga, tačkom XIII podtačka 1) alineja d) Odluke o metodologiji izrade i donošenja programa rada i izvještaja o radu Vlade Kantona Sarajevo i kantonalnih organa ("Službene novine Kantona Sarajevo" broj 1/23) je propisano da je izvještaj o finansijskom poslovanju sa mišljenjem ovlaštenog revizora obavezni prilog izvještaja o radu, a podtačkom 2) je propisan sadržaj izvještaja o finansijskom poslovanju.

Dakle, odredbama Uredbe o vrsti i postupku objavljivanja propisa i javnosti rada organa uprave, javnih preduzeća, javnih ustanova i pravnih lica čiji je osnivač Kanton Sarajevo je već osigurana transparentnost podataka o radu organa javnog sektora, odnosno organa uprave, javnih preduzeća, javnih ustanova i pravnih lica čiji je osnivač Kanton Sarajevo.

Kada je riječ o uspostavi jedinstvenog registra koji bi sadržavao podatke, odnosno izvještaje o radu organa javnog sektora kako je to predloženo u inicijativi, nema ograničenja niti smetnji kada su u pitanju kantonalni propisi, te ovo ministarstvo podržava predloženu inicijativu posebno imajući u vidu da čl. 10 i 13. Konvencije UN-a protiv korupcije („Službeni glasnik Bosne i Hercegovine“-Međunarodni ugovori, broj 5/06) ukazuju na obavezu povećanja transparentnosti u radu organa javnog sektora i veće otvorenosti i pristupačnosti prema javnosti, pa tako se ističe:

*„Imajući u vidu potrebu borbe protiv korupcije, svaka država stranka će, u skladu sa osnovnim načelima svog unutrašnjeg zakonodavstva, preduzimati mjere koje mogu biti potrebne da se poveća, gdje to odgovara, transparentnost javne uprave, uključujući njenu organizaciju, funkcioniranje i procese odlučivanja.”.*

Pored toga, članom 13. Konvencije UN-a protiv korupcije propisano je:

*“Svaka država stranka će preduzimati odgovarajuće mjere, u granicama svojih mogućnosti i u skladu sa osnovnim načelima svog unutrašnjeg zakonodavstva, za podsticanje aktivnog učešća pojedinaca i grupa izvan javnog sektora, kao što su civilno društvo, nevladine organizacije i organizacije lokalnih zajednica, u sprječavanju i borbi protiv korupcije, te u podizanju javne svijesti o postojanju, uzrocima i ozbiljnosti korupcije i prijetnje koju ona predstavlja.*

*To učešće treba jačati mjerama kao što su:*

- (a) povećanje transparentnosti i veći doprinos javnosti procesima odlučivanja;*
- (b) osiguranje boljeg pristupa javnosti informacijama;*
- (c) pokretanje aktivnosti javnog informiranja koje doprinose netoleriranju korupcije, kao i programa javnog obrazovanja, uključujući školske i fakultetske nastavne programe;*
- (d) poštivanje, unapređenje i zaštita slobode traženja, primanja, objavljivanja i širenja informacija u vezi s korupcijom.”.*

Međutim, napominjemo da je Zakonom o registru finansijskih izvještaja ("Službene novine Federacije Bosne i Hercegovine" broj 7/21) uređena uspostava, sadržaj i vođenje Registra finansijskih izvještaja, te zaštita i čuvanje dokumentacije i podataka iz Registra, koji vodi Finansijsko-informatička agencija (u daljem tekstu: FIA). Članom 10. stav (3) ovog Zakona propisano je da svako može, bez dokazivanja pravnog interesa na temelju pismenog zahtjeva i uz naknadu zatražiti izvještaj, fotokopiju ili ispis dokumentacije iz Registra u skladu sa općim aktom FIA-e kojim se uređuju uslovi i postupak ustupanja prava na korištenje podataka iz Registra. Članom 11. istog Zakona su propisani uslovi i način ostvarivanja prava korištenja podataka koje FIA ustupi korisnicima podataka. Pored toga, Pravilnikom o uslovima i postupku ustupanja prava na korištenje podataka iz Registra finansijskih izvještaja („Službene novine Federacije Bosne i Hercegovine“, broj 105/21) uređeno je ustupanje prava na korištenje podataka iz Registra, vrste, sadržaj izbora podataka i svrha korištenja podataka, način, kriteriji i uslovi ustupanja podataka,

podnošenje zahtjeva, zaključivanje ugovora, kao i druga pitanja od značaja za ustupanje prava na korištenje podataka iz Registra.

Imajući navedeno u vidu, smatramo da je potrebno obratiti se Federalnom ministarstvu finansija i FIA-i kako bi se utvrdilo da li odredbe navedenog Zakona, ili drugih federalnih propisa sadrže ograničenja koja bi predstavljala smetnju za uspostavu Registra kako je to predloženo zastupničkom inicijativom zastupnice Jelene Pekić.

S poštovanjem,

Dostaviti:

1. Naslovu;
2. a/a.



